



*Le Seigneur promet lignée & benediction à Abraham ; & il reçoit en sa maison trois Anges.*

**L**E Seigneur continuant ses promesses d'alliance à Abraham, luy dit ; Tu n'appelleras plus le nom de ta femme Saray, mais son nom sera Sara, laquelle ie beniray : Et te donneray vn fils, que ie beniray pour croistre en Nations ; & les Roys des peuples procederont d'icelles. Adonc Abraham se prosterna, & se soufrit, disant ; A sçauoir-mon, si vn homme âgé de cent ans, & Sara âgée de nonante ans peuuent conceuoir ? Puis il dit, A la mienne volonté, Seigneur, qu'Ismaël viue deuant toy : Et Dieu dit, Certainement Sara t'enfantera vn fils, & appelleras son nom Isaac ; & establiray mon pact en alliance perpetuelle. Et quant à Ismaël, ie t'en ay exaucé : voicy ie le beniray, & le feray multiplier, & si confirmeray mon accord avec Isaac ; que Sara enfantera l'an qui vient. Abraham donc accomplit les commandemens de Dieu, en la circoncision qu'il fit en sa personne & famille. Et depuis le Seigneur s'apparut à Abraham à l'entrée de son pauillon, & vid trois hommes arrestez ; & Abraham se iettant à terre, dit, Seigneur, si maintenant i'ay trouué grace vers toy, ne passe point plus outre. Et lors Abraham avec diligence fit preparer ce qui estoit necessaire pour eux, puis ayans repeu, fut reconfirmée la posterité à Abraham par la naissance d'Isaac.